

全唐文



欽定全唐文卷七百二十四目錄

崔郾

唐義成軍節度鄭滑潁等州觀察處置等使金紫

光祿大夫檢校尚書右僕射使持節滑州諸軍

事兼滑州刺史御史大夫上柱國襲封密國公

賜食邑三千戶高德政碑 并序

韋乾度

條制四館學生補闕等奏

駁左散騎常侍房式謚議



桃源觀石壇記

李膺

為江陵鎮李石賀崔鉉箋

題惠山寺詩序

徐襄州碑

班肅

笙磬同音賦

張師素

唐故東莞臧君夫人周氏墓誌銘

杜元穎

授段文昌中書侍郎平章事制

請令沈傅師在外修實錄奏

對茂才異等策

翰林院使壁記

翰林別身整時

博茂本異時策

請公休休時時以妙筆珍表

好對文昌中書封雅平章事歸

林示蘇... 夫人...

欽定全唐文卷七百二十四

崔郾

郾字廣畧清河武城人舉進士書判入等授集賢殿校書郎累遷吏部員外再遷左司郎中元和十三年為吏部郎中遷諫議大夫

唐義成軍節度鄭滑潁等州觀察處置等使金紫

光祿大夫檢校尚書右僕射使持節滑州諸軍

事兼滑州刺史御史大夫上柱國襲封密國公

食邑三千戶高德政碑

并序

維天之高仰懸象以辨其方維地之廣資崇山以鎮其域
申甫當列岳之位允文應上將之星合德配功古今攸重
巨唐二百廿載穆宗皇帝握符御圖思勲烈之臣重藩維
之寄詔工部尚書高公承簡建節義成軍佩金魚印洎督
郡而遷鎮於滑臺粵二旬教化成號令行軍旅知訓黎人
安業咸懼公報政之晚乃明進律移理乎他邦則三軍將
安於拊循闔境遽叨於惠養於是部將試祕書監兼殿中
侍御史李忠義等三州耆老縉黃等五百人瀝懇披誠遣
監軍使宋守義以聞於天子願紀羊公於峴首復借黃君

於潁川惟聖知賢特可其奏乃詔翰林侍講學士中書舍
人臣郎俾纂述其績刻於貞珉式昭我公之殊勲昭示來
裔曰公渤海人也曾祖夔皇朝涼州司馬贈涼州刺史大
父行暉試懷州別駕贈戶部尚書烈考崇文邠寧慶節度
使京西諸路都統檢校司空同中書門下平章事南平郡
王贈太師在憲宗朝劉闢恃西州之險阻兵自固卒被誅
戮時則司空解梓潼之師覆其巢穴殲大憝以靖乎庸蜀
鴻功煥爛刻於旂常在穆宗朝李齊乘大梁之驚擁眾構
奸以稽王命時則僕射公率眾之郡兵遂奔潰戮兇徒以

固其譙穎豐功赫奕鏤於景鍾先皇嘉樂趙之勲用韓彭
之畧俾總旄鉞殿於是邦濟代成家乃享其福宜茲懿美
豕韋故國白馬通津處東夏之衝要襟西城之捍蔽綿地
千里提封三郡利兵勁卒雄武實首乎天下盡忠死難勲
績常冠乎藩方故節制澄清之權皆以賢侯良帥精鍊勲
庸董其職所以重劇部而獎勞臣也自元和末歲東土艱
勤調發徵求曷嘗底寧陰沴繼災蒸人重困田畝棄耒耜
里門空杼軸邑有瘡瘠路有餒殍徵稅徒限於編戶行賞
不及於連營公始下車勞以安之來以康之政以悅之廣

敦勸之方以道之浹辰而教行朞月而俗化於是起凋瘵
復流庸野歸其耕家舉其織咸被膏澤而無殘人然後條
舉前弊拜章列聞乞免逋責以寬征徭殊恩俯降特遂其
請於是鰥寡蒙其生惠游惰勤其力穡咸適樂土且無廢
時此龔遂所以播嘉聲也奸豪飢歉之餘奸盜萌起小則
私竊於里閭大則推剽於康莊抵法禁及留獄犴者布列
於郡境夫以居人宥密之地孰不愛身思安全而避刑辟
者率性之常道孰能保生憐其濫以宥其死者公獨推好
生之德察小大之獄盡哀敬之心貸其科條咸使全活故

謳謠於封部釋寃滯於比寧此安隆所以成茂化也高旗
長轂精甲銳師勤王之役比歲而舉竭廩廡以給兵食殫
府庫以奉軍裝弊耗以空物力未復及公戾止則禁彼浮
靡修其潔廉由身以率人自家以形外鍾鼓之樂不注於
心耳采華之飾不被於閨闈節其宴游絕其玩好無私積
以厚於己必多方以贍於軍由是寒者溫餒者飫資用是
給戎行臻寧此祭征虜之奉公也自頃師徒荐興節將屢
換咸有紀綱之僕用資肘腋之親因隸是弊且非吾土方
俗之異董率攸難公威令訓齊惠綏周洽感義戴德洽爲

一心若凝寒之被陽和如嬰兒之蒙顧復皆願畢力以奉
轅門此馮征西之得眾也至若罷不急之務黜冗食之徒
戎器未備則造器者加意而戎器精焉戰馬或闕則有馬
者增職而馬政修焉繕城池以固其金湯飾解署以避其
燥濕是皆賈彼餘力因其羨財人樂就役故無煩功不逾
時故無害此又斲勞永逸之嘉績也美化之所燠灼深仁
之所浸漬發於天和達於人心割股以致養廬墓以盡孝
非懿行昭感變其澆俗歟功利及於人慈愛布於下戎士
愛戴編昨樂康則有潔祀以薦誠虔禱以資福非厚德濡

煦激其深衷歟雖漁陽之詠兩歧蜀郡之歌五袴比功類
善此無愧焉當吳元濟拒命淮西公領相國晉公牙門之
任累以長策贊乎兵機及上蔡削平羣師旅旆詔以郟城
之地析置澉州非寬能愛人無以康疲俗非威可馭衆無
以定新邦晉國乃表公之材請受符命於是掩骼埋胔以
導其和氣拯饑救患以濟其凶年治屯營以劭農功補壞
隄以平水害解宇之卑也則遷諸爽塏而高其開闔傳置
之闕也則勦以道周而豐其儲峙故有甘泉芝草之瑞焉
詔嘉其功移守鉅鹿先是州封綿廣人力凋耗兵革之後

田萊多荒公乃計其戶版悉以配給比盡地利且廣賦輸
疏漳州潰溢之源開龍崗廢塞之室俾以善課嘉績如激
政焉復以高第遂遷於宋淮海衝要舟車會同洎公來思
眊俗嚮化屬浚郊之變連封俶擾宋爲屬城之近且居下
流兵力未任物情疑駭公乃蒐索補卒以張其氣燄借貸
斂粟以備其困乏密表以布誠飛檄以請援賊芥遣同惡
曹簡使於宋悉索官私之財公斬之以徇自是兇徒奪氣
矣竟能奮義旅陳款誠勵支郡抗敵之心絕羣盜乘隙之
勢公之功也策勲楹賞鎮于魯邦當憲宗皇帝掃盪青齊

分裂疆宇合充海沂密四郡之地爲東南藩雖屢更翦惡而俗未丕變公於是詳究利病備陳綱條復闕里之風化修淹中之禮樂寒暑一換報功義寧旌政進秩乃之茲土凡三剖郡符再陟齋壇冠左貉儀大憲以至於冬官長皇上嗣位嘉守土之臣大布德澤叙升品列改受尚書右僕射所以寵新績而褒舊勲也惟公端肅莊明溫仁惠和戴君則竭其忠臨難則致其命至於字疲人撫三軍若治身疾如理家事公用不足則舍私財以繼之飢人無告則散清俸以賑之故能使部校服義蒸黎飲化若熙陽春若饗

太牢此所以建休勲彰茂節處貴位樹雄名諧大君之倚
注鋪冊府之光耀者矣昔鄭武繼威桓之德而嗣爲藩宣
條侯纘絳侯之功而復爲將帥惟公克荷先訓顯揚休聲
疇庸自列乎方隅延代繼分乎茅社君子爲積善之祉鍾
於高氏也宜哉夫播美在詞貽惠在公爰書盛德永勒豐
碑俾後之人知甘棠之陰留此地也詞曰

上標星辰下建藩方分彼土宇授茲忠良烈烈高公家聲
載揚應運宣力合於我皇東郡奧區豕韋舊疆化用浹洽
俗臻阜康昔在元和坤維構亂南平奉詔提師翦按乃執

渠魁乃清巴漢遂陟文治爰登邦翰逮於長慶夷門不龔
公復仗義首是奔衝活全支郡屢挫羣兇錫以齊斧藩於
魯封惟帝念功時當進律俾臨東夏用屏王室元侯重寄
拔卿顯秩以布疇隸以討軍實公之牧人以本於身若灑
和風如熙上春緩其逋逃賙其窶貧嘉惠樂施善誘循循
室有絰績野有稼穡俗知禮讓吏無掊尅于以詠歌公之
令德公之理兵以推其誠撫馭用信將和用平俎陳廊廡
惠遍羊羹同彼休戚均其寵榮百城秉命十連從令姦慝
不作封疆底靖于以詠歌公之善政爰升右揆式殿名藩

禮竣師長勲高翰垣惟公之忠惟帝之恩人瞻邵父家識
臧孫乃勒豐碑昭示後昆陵谷有變德馨常存

韋乾度

乾度元和中官吏部郎中守江州刺史長慶二年拜國子

祭酒

條制四館學生補闕等奏

當館學生每年有及第闕員其四方有請補學生人並不
曾先於監司陳狀便自投名禮部計會補署監司因循日
久官吏都簡舉但准禮部開牒收管有乖太學引進之路

臣既忝守官請起今已後應四館有闕其每年請補學生者須先經監司陳狀稱請替某人闕監司則先考試通畢然後具姓名申禮部仍稱堪充學生如無監司解申請不在收管之限舊例每給付廚房動多喧競請起今以後當監進士明經等待補署畢關牒到監司則重考試其進士等若重試及格當日便給廚房其明經等考試及格後待經監司解送則給廚房庶息喧爭當監四館學生有及第出監者便將本住房轉與親故其合得房學生則無房可給請起今以後學生有及第出監者仰館子先通狀納房

待有新補學生公試畢後便給令居住當監承並無專知館博士請起今以後每館眾定一人知館事如生徒無故喧競者仰館子與業長通狀領過知館博士則准監司條流處分其中事有過誤眾可容恕監司自議科決如有悖慢師長彊暴鬪打請牒府縣錮身遞送鄉貫

駁左散騎常侍房式諡議

詳觀貞元之末西蜀之事逆豎劉闢構難之初兇邪叶謀噉嘯相聚年深事遠十不記一然而魄磊不平鋒刺疊深者藏在骨髓請舉其梗概一二焉式自忠州刺史故太師

奏授劍南西川度支副使後兼御史中丞又剖符蜀州是時貞元十八年也式因晝日昏睡如醉經宿乃寤詢其左右僮僕不知其所從來後逾年卻復使職會故使太師薨歿劉闢潛扇逆謀禍亂始胎式遂倖姦人之意爲譎恠之語謂闢曰乃者蜀州昏病之中見公爲上相盧文若爲侍郎儀衛甚盛富貴極矣他日無相忘賊聞大喜布滿軍縣自以爲神授非人力也賊每接賓客肆談論撫羣邪申號令未嘗不以是爲先聲自以爲祥兆也豈不因式作異言鼓妖孽惑亂平人堅壯兇險不然何區區之蜀瑣瑣之寇

王師討伐經費萬計崎嶇阻險留年乃拔何哉蓋以式深
爲浹洽之辭激切嚚固不然何盤柢固根之甚也故使太
師永貞元年八月薨其時乾度任殿中侍御史前使度支
判官劉闢自攝行軍司馬節度留後九月初乾度被逐攝
簡州刺史名雖守郡其實囚之明年四月追廻勒攝成都
縣令其時授闢西川節度詔命初下東川之圍未解乃召
募亡命兼收管內鎮兵張皇虛聲熒惑郡縣發兵七千馬
畜三萬號爲十五萬人轉牒蓋屋以來縣道郵次酒肉畢
具芻茭無匿署牒首曰闢副曰式參謀曰符載令下之日

妖氣全興下愚沸騰貪冒姦賞奔走叛命肩摩轂擊爭死
恐後當此之時邛蜀震驚田野廢業竄伏山谷邑居人吏
分散道路如此之時非得之於人皆親所聞覩時賊圍逼
梓州之日又王師諸軍稍稍繼至猖狂兇寇不復張矣然
嘗察式爲人柔而善佞不顧不義不然何劉闢文若喬規
符載皆咨諏執禮拳拳以事之以斯而言可以知其所止
矣伏以聖上法維天之度崇納汙之宏雖元澤滂流鼓盪
昭洗然易名之典在正根源苟非其人不可加美如式西
蜀之事大節已虧缺矣何面目以求諡焉頃之爲諡頗乖

前狀請下太常重定謹議

桃源觀石壇記

并序

大唐元和十二祀睿聖文武皇帝御宇之十有四載戡定
淮蔡之前年余出爲銅陵郡守之去歲也江壤穰秀草木
繁翠深流有沅湘七澤龜鼉息焉巨獸有犀虎貔象金碧
生焉余嘗嘿胎由有所自蓋以密邇靈囿仙源在中驗方
志秦人獲天爵之所稽近聖元宗皇帝樹火棗之鄉風流
好尚事見方俗觀有道流姓陳氏字通微夙稟命範師資
於是師沒道存復嗣守焉耽虛樂靜志願斯畢時因暇日

儼然造余曰靈山瑞相莫可勝載觀有祠壇土級三成每
凍雨霖洒常多圯缺修建齋籙展敬無所今有微願欲改
剏石壇竊惟少假餘光冀遂成立余即時回嚮謹奉仁敬
乘流者衆而果有所成遂徙鍾簏於元宮奏鴻音於象帝
洞壑皆滿靈風肅然陳君道友曰志言姓王氏研精守一
叶力贊功志同之人樂此榮觀乃爲謠曰靈壇肇址兮何
代留秦人唱道兮因避仇我唐六葉兮天子聖金虬三檢
兮遙申敬封山表地兮持彩旄真官陪雲兮五帝遊山藏
瑞靄兮非所求偶見桃花兮隨水流猛簏嗥風兮棲洞樓

停酸苦兮暢六幽中有道士兮飛金液泉澄日照兮抱虛
寂化坤壇兮斷珉石齊大壤兮煥琳碧我唐聖祚兮千億
載隨師控駕兮方諸會

大李隲

開成時爲荆南判官咸通中擢太常少卿宏文館學士

出爲江南西道都團練觀察處置等使檢校左散騎常侍

兼洪州刺史御史中丞

爲江陵鎮李石賀崔鉉箋

某早拜光塵叨承眷與深蒙異分屢接清言幸會顧於厚

恩俯見循於末契去載分麾南楚拜節西秦思賢方詠於
嘉魚棲止實慙於威鳳賓筵初啟曾陪罇俎之歡將幕未
移已在陶鎔之下先生鄰部喜溢轅門豈惟九闕獲安
斯亦一方多幸

題惠山寺詩序

太和五年四月予自江東將西歸潯陽路出錫邑因肄業
於惠山寺居三歲其所諷念左氏春秋詩易及司馬遷班
固史序離騷莊周韓非書記及著歌詩數百篇其詩凡
言山中事者悉記之於屋壁文則不載其寺會昌末經廢

毀屋室殆無存者去年蒙恩自禁職出鎮鍾陵鍾陵與毗
陵地不相遠而惠山居其屬邑間其寺復置會錫邑宰去
年過此留宴數日今於予爲故人因寓書請再題焉嗚呼
自太和癸丑至咸通己丑三紀餘矣念邑中居人與僧居
在惠山興寧兩寺者今無人焉染翰增悲復何言耳咸通
十年二月一日江南西道都團練觀察處置等使中散大
夫檢校左散騎常侍使持節都督洪州諸軍事兼洪州刺
史御史中丞上柱國賜紫金魚袋李隲題記

徐襄州碑

大中十年春今丞相東海公自蒲移鎮於襄四十年詔徵
赴闕今天子咸通五年公爲御史大夫自始去襄於茲六
年矣而襄之卒校民吏自七州之幼艾追思公之養育教
訓相與上言京師狀公之事績請於天子刻之碑石用昭
示於無窮於是天子嘉公之勤詔可其奏明年二月襄之
父老請詞於公之舊軍副使太常少卿宏文館學士李隲
曰凡紀公盛德丕績文於碑石將傳乎百千萬年宜用聞
見詳熟者則得其實隲固淺陋今適當職而爲之非以文
明也敢於是承命退而敘之公名商字秋卿家世儒門修

源長波流芳積潤自十五代祖諱欽十四代祖諱某兩世
繼爲中書侍郎十三代祖諱湛十一代祖諱孝嗣間代繼
爲太尉南朝之盛具在南史本傳生公七世祖諱文遠隋
朝爲國子祭酒皇朝爲國子博士儒學尊顯名冠國史儒
學篇高祖幸國學召博士講論春秋諸儒莫能對本朝司
刑卿追諡忠公諱有功即公五世祖也自中書至司刑十
葉服冕乘軒重榮疊慶光隆赫顯無與爲比司刑當天后
時累爲法官用法平恕常以潛德陰功論出在陷力排酷
吏之勢盡忠竭節以保護皇室公能嗣之炳爲元臣初公

少時工學暇豫不爲嬉戲嘗以生民休戚爲己之任凡所
經涉郡國土俗四民之業必皆詢訪而究詳之於其利病
無所不通曉常曰使得一縣治當必爲良吏矣始舉進士
文宗五年春考登上第陞朝爲御史會昌二年以文學選
入禁署宣宗以北邊將帥懦弱不武戎狄侵叛公時爲尚
書左丞詔以公往制置安撫之歸奏稱旨尋授河中帥節
又移襄陽公自初仕以至丞相華貫清級踐厯居多而未
嘗履趨競之迹含光蘊德容貌若虛人皆汲汲我獨委順
嘗任殿中侍御史丞入中書白事執政因問徐殿中果何

如人承曰今之賢人也執政曰然禮部員外郎缺諸公見
言其所言者或再來詣某有三至者徐殿中亦在薦中
足未嘗及其門殆真賢人與子言是也卒以禮部與公始
爲內職不治民及受重藩使絕塞則用前所蘊蓄道以寬
恕爲本本於誠明吏民畏公之詳達而不敢欺戎虜感公
之德惠皆願向服其來鎮襄陽也亦率是道故期年而仁
信敷再朞而刑政省三年而帑廩實四年而禮義興風教
備問民之所病及願欲而不得者必盡去而皆行之所行
之政存而不朽者有八今具襄民之狀庶得傳其顯實云

其一曰漢南數郡常患江水爲災每至暑雨漂流則邑居危墊築土環郡大爲之防繞城堤四十三里非獨築溺是懼抑亦工役無時歲多艱憂人倦追集公乃詳究本末尋訪源流遂加高沙堤擁扼散流之地於是豁其穴口不使增修合入蜀江瀦成雲夢是則江漢終古不得與襄人爲患矣其二曰襄陽荆鄂十道之要路公私來往充給實繁是必率配行供假借辦賄求利歲月不堪公乃悉用官儲創置什器富供給費不擾齊人往來徒所憧憧邑人信皆不知矣其三曰軍人百姓窮困者多投狀陳論苦於從前

債利蓋以數十邑公私債負不許停至於補累攤徵有加
無減遂使家傳積欠戶率催足延及子孫例無放免飛走
無路怨憤難伸官

所收私室常被攪擾公乃縷悉

上奏放免獲依債戶既
冤聲永息其四曰承前役納所
由在田在城居側近者近百頃統謂之馬禾比每年配諸
將官健出力營種率歲出功錢人不下六七百例入屯將
所由官田元無所獲徒遺虛監將額添市耕牛破費甚多
收獲無幾公乃廢卻其地判租與人每歲所收卻耕種之
利租人皆獲利使將健永免工傭其五曰襄土疆濶遠連

接江山每至秋時常多寇盜張旂結黨夜出晝藏謂之山
柵擾害頗甚燒劫間并驅率平人至於道塗皆須警備公
乃選擇少壯官健三百人別造營各爲捕盜將常令教習
不雜抽差訓練無時以爲備禦每聞屬縣寇劫當時據數
抽行晨往夕歸夜發晨至皆是并賊捉獲更無子遺頓挫
賊心鄉閭遂泰因創造捕盜將營屋四百間分爲左右中
間開報點集列塿置標別創一亭以爲教試之所奏立將
額門當通衢過客行旅莫不興嘆大中十一年諸郡構亂
起於湖南準詔徵兵同力剪滅漢

中徵五百人尅日成

功實自捕盜威強之力又江西叛將毛鶴構亂比諸道最甚收復倍難成功當時韋宙僕射乘遞先至襄州奉詔令差兵助發遣所差五百人於數內全取捕盜將并差捕盜都將韓季友惣領兵士小路進發仍先揀擇通引官衙虞候史慶中與韋宙僕射爲元從押衙齎榜帖先至江西安存百姓遂收劫亂兵器甲及韋僕射舟船至江州其韓季友請捕盜將官健三百人開道分六路先去平明齊到人皆不知機計旣行遂半日內面縛賊將授首者一十三人當日行刑傳首赴闕韋宙遂奏請且留捕盜將二百人在

江西并奏請權差韓季友爲都虞候二年之中重修置解署城市皆捕盜將功力其六曰荆南中路有蠻水驛地當卑下泥淖常多暑雨之時不通車馬皆是結棧牽挽以濟公私行人力出編昨妨害農業繚繞甚遠兩縣勞辛遂徑捷就高別一路度宜造驛永無差倣之虞又近於當路十二里其七曰襄州兩稅每差綱官送納并有直進膠臘其數甚多例屬新官豈免敗闕陪備差遣擾害頗深每吏部注官多不敢受因訪問資綱大數可以資陪人遂請度支陸運腳搬馱到京遣進奏院所由勾當輸納旣免損污疋

帟又免上供失時襄州新官永無差役之弊其八曰漢陰
驛西舊有江亭一所迎候皆於此前後窄隘不便筵宴所
要鋪陳須至漢陰驛上廳內遂使前後虛豁難置門牕重
客居停全無牀幅結束非便寢止難安遂別構設廳以備
迎送長廊虛檻連接大廳怪石脩篁羅列其所江波入戶
畫舸臨軒信可謂勝遊之地也又重脩瓊闈改制上廳夏
清冬溫憇息宜便別開過路繚繞江亭主客邀迎咸遂得
禮因命新亭曰漢廣亭桂江所謂不朽之制凡公之為民
於除害興利若屈到之芟子反之飲文王昌之蒲葅雖勞

支體勤思慮舍辛茹苦必行之未嘗一日而懈也故制貧
民侵刻之負罷疲卒奸濫之政公之仁也訓驍勇以擒盜
繕甲兵以備武公之義也具候館之器用豐饋勞之餼牽
公之禮也決高沙之壅徙蠻谿之傳公之智也免屬官之
綱致及時之貢利必舉害必除公之信也夫總五常以在
躬之謂德德及於民之謂政功之被於物也淺則其澤易
竭政之被於物也深則其久愈彰公之去襄六年矣民始
懷公之德政而追思詠歌之得不謂之被物久而逾彰公
之德乎與夫在治而民之謂疑者異矣公前治蒲亦由是

德突厥居特峨山者千二百人相率自外塞渡河歸附於公朝廷以虜眾持疑兩端未即信納公乃召其酋長以恩信諭之虜皆泣下釋兵解甲伏以聽命因請從齊魯之間隙地以居之編籍爲耕民奏置備征軍千人日令督習無有他役凡盜有新發無不立赴者又教其軍積紙爲戰衣千五百領矢不能陷歲飢乏食民流徙不止於是告廩發稌豆麩賤出以救之完治城廨列樹表道用民之力而厚其酬傭濟活以萬數逾朞乃罷有禽俱巢於屬邑之樹其一巢者爲鷲鳥所攫日暮羣鷲哀鳴聞者異之憫其孤遠

往食之愛均已子穀鳥能飛而後去人咸以爲至德之感
及禽鳥焉故公前之治蒲其仁澤被於物也旣如彼今之
治襄其德政及其物也又如此庸詎知異日蒲人之不有
相率聞於天子而請公之德刻於金石以傳乎無窮哉亦
將必有采者矣謹繼銘曰立侯昔又茲軍旅於公
公德之容宏深粹元公仁之豐沈積穠穠內愉外懌溥暢
昭宣政以之和民以之安在昔羊公惟德之理有碑於峴
實表厥美烈烈顯德蹈之者誰曠祀六百惟公繼之繼之
者何愛民若子苞寒舖饑其急逾已日者大江淫至於民

萬門之命將盪而覆是寃是度惟公之規乃決巨壅大沴
以移公之來朝民泣牽衣公進就路攀車從公專鹹鹺利
無歸於私公長御史朝綱以釐帝曰汝賢汝可承弼公遜
不答退惟讓卑帝心益嘉會襄人來請祀公德刻之於石
帝曰賢哉汝真吏師政苟不惠人誰汝思嘉乃懿績遂命
起之告示襄人謂爾咸宜帝德明聖爾言適時勿謂天高
其神可欺勿謂室暗而公不知善不善報惟其所施爾不
吾信視公之爲蒲民之生實公是營襄民之富實公是覆
漢波滔滔其注維東公思在人與彼無窮公澤惟川公壽

惟山是禱是祝期千萬年崇碑峩峩揭於峴巔民望而思
永昭後昆

班肅

肅貞元中進士官坊州刺史擢司封員外郎

管日習笙磬同音賦

清明廣大之謂樂度曲節奏由乎器既克諧於五聲諒同
歸乎一致汶陽之孤篠斯有泗濱之浮磬云備吹噓爰發
搏拊適至等輔車之相依契歌詩之必類同夫影響常動
靜而俱隨象彼熏篴每應感而不匱聯綿並奏聲音相和

用不殊途方予唱而汝和動而相觸固無偏而無頗列其
容異薰蕕之共器會其理若涇渭之通波載清載濁貫三
才之合樂若浮若沉叶六律而揚音將九成而備曲比二
人之同心如言行之相顧成乎慥慥冠鐘鼓之迭奏樂彼
欽欽雅韻復興時則若舞鸞鳳和聲互應斯乃如鼓瑟琴
音之作也曲無誤者倏爾合度鏘爾中雅寧有顧於周郎
自不惑於子野訢合皇王之化跡混同車書於天下遠而
聞也謂羣鶴和鳴於碧空近而聽之如廣樂調韻於春風
鏗鏘間發要妙無窮類金蘭之堅芳美而取媿配文質之

彬郁和而且同何異夫相應在於同聲相資在於同志譬
權衡之並用謂相待而成等韋絃之自節則以同而異原
夫律呂咸在吹擊惟時異周旋而樂只可終始而從之兩
器元通鳴簧與幽石相感二者冥合竹聲與石聲相追審
至樂之盡美伊茲器之可持

張師素

師素元和時人

唐故東莞臧君夫人周氏墓誌銘

夫人姓周氏其族望本乎汝南今爲陽羨中江里人也祖

莊父俊皆不尚名宦抗跡邱園孝弟謙恭仁行昭著夫人
淑慎貞賢溫柔令範自禮歸臧氏之室而琴瑟叶和遵孟
氏之風規有班家之令譽嗚呼元穹降禍大夢忽臻未偕
知命之年奄促泉臺之痛以元和十三年歲在戊戌三月
四日終於義興平西里之私第享齡四十有四亦以其月
甲申廿六日巳酉安厝於中江血瀆東北之平原周氏祖
業之園地蓋從龜筮也有子曰奉言始童艸有女二人長
未及笄俱號訴之無依憾慈容之永隔恐桑田變易陵谷
傾頽故勒記貞石乃爲銘曰

雙劍光芒兮嗟一沉鳳歸杳冥兮鸞孤吟撫稚子兮淚盈襟悲隴樹兮愁雲深

杜元穎

元穎宰相如晦裔孫貞元末進士又擢宏詞元和中累遷

司勳員外郎知制誥穆宗立超拜中書舍人戶部侍郎承

旨長慶元年同中書門下平章事加上柱國封建安縣男

罷爲劍南西川節度使再貶循州司馬卒年六十四贈湖

州刺史

授段文昌中書侍郎平章事制

門下眷求輔弼期在濟時必惟才臣乃克成務况端潔剛
毅可以肅具寮敏裕周通可以熙庶績外無飾虛之體中
有效實之誠簡於朕心乃命以位朝散大夫守中書舍人
翰林學士武騎尉賜紫魚袋段文昌門襲忠勲器包才傑
廣而不雜峻而能溫脩詞每掇其菁英所尚者風格發言
必探於指要所貴者變通識古今理亂之原知遐邇利病
之本自掌文翰苑列籍金門出入五年恭勤一致屬朕初
承寶命屢進嘉猷諒我憂惕之懷竭其公忠之力昨因召
見更用咨詢造膝之言注意斯得必能奉將明之大任申

獻替於虛襟爰升鼎鉉之司冀展舟楫之用於戲萬務之
始九有所瞻將致治平可不兢勵爾其夙夜惟慮輔道朕
躬使四夷咸賓百度惟又阜俗必蘇其疲瘵審官無鬱其
賢能理當詳於幾深道當固於久大惟自誠可以化物惟
克已可以律人勉哉戒哉無忝我首命之重可守中書侍
郎同中書門下平章事

請令沈傅師在外修實錄奏

臣自去年奉詔命各據見在史官分修憲宗實錄今緣沈
傅師改官若更求人選擇非易其沈傅師當分雖搜羅未

周條目紀綱已粗有緒竊以班固居鄉里而繼成漢書陳
壽處私家而專精國志元宗國史張說在本鎮兼修代宗
編年令狐峘自外郡奏上遠考前代近參本朝皆可明徵
實有成例其沈傅師一分伏望勅就湖南修畢先送史館
與諸史官參詳然後聞奏庶使官業責成有終始之效傳
聞撫實無同異之差

對茂才異等策

問大禹求賢而夏德長茂文王多士而周道緝熙然則爲
政在人人存政舉朕德薄化淺嗣膺寶業夙興寅畏若涉

大川求思至謨庶答天誠子大夫志行修潔學術通贍儲
思於天人之際研精於大道之極儼然就辟良用嘉焉廼
者夷夏多虞烽鞞屢警因之以荒饑生人蕩析北屋榛蕪
今八表甫清萬兵未戢朕恭承丕緒實濟橫流期致和平
惟新制度而成湯受夏周武定殷劉矯羸弊魏乘漢俗以
亂爲理以安易危必有至政存乎令典同符今日可舉而
行精辨所長著之於策禹謨之六府三事周法之八政五
紀有守有爲是彝是訓經綸遠古用彰得失國志詳載天
官必書成務濟時莫斯爲急並宜明勅功利別白條流較

聖王之損益揆今代之用捨沿革之要茂對所宜今欲廢
關市之征輕什一之法

賦一作

歸踰年之戍罷無事之官則

國用靡資軍食尚歉人多胥怨邊有侵軼匠無良畫明示
謀謨其法令或不便於時吏人將未適其任賢士見沈於
負俗遺綱有補於化源可以均沃瘠於原田便工商於市
肆改制徵物釐創見正復務官曹澄清流品使朝有濟理
之仕邊有死難之臣而返俗廉隅還風樸略必書效實指
陳利害授簡之外尚有令圖各罄所聞備申讜議虛懷固
久勿隱予違

對臣元穎案周易君道下濟臣志上通謂之泰其繇曰小
往大來臣厯觀書契以還君德定位未有遺斯道而能達
聰明目光極鴻業者也伏惟陛下誕膺明命克敷文德親
降大問詢於微臣愚臣智識庸鄙經術短淺不足以充明
詔之言而隱罪大矣敢不俯罄愚衷仰謝萬一制策曰朕
躬承丕緒實濟橫流期致和平惟新制度且成湯受夏周
武定殷劉矯羸弊魏乘漢俗必有至政存乎令典者臣聞
湯革夏政野以質武革殷政鬼以文秦暴以亡漢寬以矯
此皆古王之令典也比東漢旣衰皇綱幅裂曹操挾天子

以令諸侯用漢法以取威權中原粗平遂偷神器其改刑
典禮踏駁前世固非蕭曹畫一文景更令之比也雖曰革
命固無足采陛下承七鬯以取大器赫雷電以掃羣兇功
高一戎業定再造欲維新制度以救生靈幽明動植罔不
稱慶實天下幸甚然臣之私心有願獻替不憚斧鉞以干
龍鱗伏惟陛下少留意焉臣聞自古王者易姓受氏告成
於天則維新制度以改人視聽所以示亡王之驕僻也所
以揚造邦之耿光也其餘少康復夏武丁興殷武王興周
先武紹漢則皆舉用舊典以昭其先朝之休德淳茂也以

辨其兇逆之滔天干紀也以志其昭前之光而纂修其德也我高祖勤恤人隱始除暴亂而建王業我太宗叶贊經綸增輝先聖皇天眷祐祚以名臣於是酌之人心參之典禮立我王度爲萬代業陛下誠宜恭以守之勤以行之克配彼天立我人極矧乎周秦漢魏造邦之事非臣之所宜言也臣又伏見去歲徵臣等詔書聖旨殷勤憂天謫見今制書首章則曰求思至謨以答天誠次曰期至和平維新制度下曰改制徵物釐創建正臣伏念聖上豈不以彗有布新之道明欲承順天意旌於國章乎臣愚以爲自古災

眚多矣大者天地震裂次者日月薄蝕小者星辰變謫皆
或應或否繫於其君之德也夫嚴風不能凋翠葉凝寒不
能冰醇酎何則不當凋者風則何有不當冰者寒亦胡為
然則災眚者天道之常無德者當之不為有道者害亦已
明矣陛下若欲寅畏上天大為恭禦則德為之實而禳為
之華居其實不居其華此社稷之景福也制策曰禹謨之
六府三事周法之八政五紀有守有為是彛是訓經綸濔
古用彰得失國誌詳載天官必書成務濟時莫斯為急宜
明勅功利別白條流者臣聞夏禹之弼成五服也肇謨六

府三事周武之誕敷明命也實陳八政五紀語其功利其
六府者人仰以生三事者德據以成八政爲經國之用五
紀爲歲天之道別其條流則曲直木也從草金也水以潤
下育物火以炎上同天土順則五稼阜滋穀登則烝人乃
粒直己以正德理財以利用務本以厚生此九功所以惟
敘也八政食所以生人也貨所以聚人也祀所以仁鬼神
也司空實平水土司寇實詰姦慝司徒實敷五教賓以叶
多方師以具七德此先王保乂萬有也周星者歲之紀合
朔者月之紀信旬者日之紀星辰以察乾象厯數以授人

時此先王所以合德二儀也得其道者王失其道者亡古今雖殊其致一也陛下執古之道馭今之有降此彛訓以及於臣但稟師說難副睿問制策曰較前王之損益揆今代之用捨沿革之要茂對所宜者臣聞貫古今蔽天壤而不可易者道與德也時損益而皆便於理者名與物也所以無體之禮無聲之樂倚道之主莫不襲行其餘正朔服色聲名文物則三代已降逮乎陳隋各從其所尚爾伏惟陛下視其善者用之其不善者舍之此沿革之要也制策曰廢關市之征輕什一之賦者臣以征關市稅什一者古

今通典苟不踰轍無害於人誠宜取之以資國用陛下明
欲廢之輕之以息黔首甚大惠也然臣以爲百姓之患者
不生於此生於法令不一賦斂迭興名目滋彰杼柚皆盡
爾今王畿之內外地州縣亦不當賦稅者何有鎮守團練
等使數州又置節度度支使皆多聚強兵增置部伍車禾
斗米皆出於人計其誅求十倍王府至於睚眦之際不戢
自焚殺長吏夷城郭者又亦多矣卒然邊陲有難羽檄交
馳必不得一人尺鐵以資天討伏望陛下下曠然之詔使
內地州縣悉依平時舊帥故老盡罷以息疲人則天下賦

稅十減七八矣制策曰歸踰年之戍罷無事之官者臣聞
王卒以舊楚子所以敗也將驕卒情項梁所以亡也今緣
邊將士功已高位已重進不求賞退不畏刑伏望申命將
帥言於軍中有思歸者內以新卒代之願充軍者復以師
律整之夫如是則軍政必行軍政必行則邊無侵軼矣臣
又聞賞功以貴任能以職古之道也伏見比歲詔旨諸員
外兼試等官才者能者改授正員其餘並依本資數進陞
下已得八柄馭功之道矣微臣又何間焉制策曰法有或
不便於時吏有或不適其任賢士見沈於負俗遺綱有補

於化源者此皆經國大體則當與朝之衆君子議焉臣位卑識寡何足裨補然臣以爲令合於經而人悅之者可存也令爲救弊而作行已久而猶未安之者可省也若乃申黜幽陟明之典則吏人砥節矣遵棄瑕錄能之義則俊乂効職矣若王綱者布於方冊顧在陛下行與不行何謂之遺矣制策曰均沃墾於原田便工商於市肆者臣聞度土功因地利所以惠衆人也禁末作絕竒貨所以惠工商也其要在於申明田令與不擾市人耳制策曰改制徵物釐創建止者伏以國家受命向二百年憲章典禮并吞千古

今陛下嗣聖御極孝理君臨華夏旣平思欲改制此皆先
聖舊典臣竊惜之臣又聞夏以木德王而正以人統殷以
金德王而正以地統周以火德王而正以天統孔子曰夏
正爲得天此不易之道也制策曰復務官曹澄清流品者
臣聞設官分職以蔽王事猶列宿定位同拱北辰也伏見
艱虞以來增制使額類官有二事人無底從銷錢銷食十
場十擾今陛下欲使復務於官人志所底此爲政之本也
臣聞政以賄成則廉者貪匪直其道則貪者廉此仕進之
情也今聖慮及此孰不潔其源而浚其流乎制策曰朝有

濟理之士邊有死難之臣者臣聞舜舉臯陶湯舉伊尹則
仁者至矣今賢才夾輔俊乂揚庭猶滄海之富珠璣崑山
之積瓊玉但恐未察耳伏望聽政之暇引備顧問則十六
相不專美於堯代矣臣又聞子驕者不志孝臣驕者不志
忠伏望陛下訓將帥以禮示師徒以義則仗節犯難者孰
變其功乎制策曰致俗廉隅還風樸略者臣以爲非理也
其化也於朝廷公卿大夫孰不尚退讓崇節儉而率土之
士疇不從風而靡乎制策曰投簡之外儻有令圖者臣以
爲當今所務者在於興禮樂務耕稼禁游食抑奢侈其餘

則詔書所以問臣纖悉矣謹對

翰林院使壁記

聖明以文明敷於四海詳擇文學之士置於禁署實掌詔命且備顧問又於內廷選端肅敏裕邁乎等倫者爲之使有二員進則承睿旨而宣於下退則受嘉謨而達於上軍國之重事古今之大體庶政之損益衆情之異同悉以關攬因而啟發若非有達識有精材一心守公百志根正則曷能保維密勿之際傳導吁俞之間哉故嘗由是職必極其位有若今之右軍梁特進樞密劉監焉當先聖躬勤萬

務志清九有築壇互登持柄驟移贊命於是乎出號令於
是乎發急宣密付波至颺去二使之任尤所重難乃以今
內給事李常暉內謁者監王士政繼領其職既而掃殄淮
蔡廓平海岱有魏以六州底貢常山以二郡獻地北逐犬
戎南剪溪蠻凡兵事之所會符檄之所至籌畧之所授告
諭之所加決於一言歟以萬里得失以之而定安危以之
而分降自九天之上行乎四海之外無不面奉宸斷兢兢
跼蹐喘汗之中揣切必究毫芒靡失不有絕人之神用其
孰能處於此乎勤勞夙夜亦云至矣我皇初纘寶祚特加

寵獎榮以金印紫紱玉帶之賜尋又就遷命秩勲階兼崇
蓋舉勞以行賞也爾其聳善嚮義愛才好直周旋蚤暮率
履無越每聞激忠之詞及有所論必加慰勉欣喜外形此
又列內庭者所共幸也至於增葺院署使羣英有游處之
安栽培松筠使多士有吟翫之適表裏融暢始終堅全固
不易得也若無題敘則將來者何以景行之因移學士舊
記遂徵前院使之官族斷自元和已後列於屋壁焉

正學始於孔子身之官然爾自天降其書以成其教是以聖賢之

不異其學也夫無與倫比者皆所以景仰之因詩學士曰

又區內致香祀其志也至矣獻章則澤於壽英良誠效之

鳳無妖毒聞婚故之歸又有祖倫必成發德神喜伏尔也

蓋舉幾以行貴也爾其登善醫藥學不後車賦效易舉也

欽定全唐文卷七百二十五目錄

宇文鼎

論減張疇胡伯忠等奏

請延英進對於本日卯前進狀奏

劾胡潛奏

陳商

請定義安太后服制狀

東都置太廟議

劉從諫妻裴氏應從重典議

金定全唐文 卷一百三十五
貽太常博士書

高鉞

論于頔諡疏
或疑歸衆

高錯

先進五人詩賦奏

復楊尚書汝士書
日限前赴衆奏

再復楊尚書汝士書奏

李公佐

趙玄全謝小娥傳
百二十五目錄

狄兼謨

請編次建中以來制勅奏

請覆勘吳士矩罪狀奏

王叡

二陣圖論

將略論

三惑論

誠節論

崔俊

請令本州定稅額奏

奏

奏

奏

二朝圖論

王

奏

奏

奏

欽定全唐文卷七百二十五

宇文鼎

鼎文宗朝官左司員外郎歷吏部倉部累遷御史中丞出
為華州刺史坐贓免

論減張璠胡伯忠等奏

當司前後推覆偽造出身文書賣官并造偽印行用等因
張璠劉嘗建胡伯忠犯罪並在太和三年十一月十八日
恩赦前准刑部大理寺詳斷悉處極刑准斷獄律赦前斷
罪不當者若處輕為重宜改從輕處重為輕宜依輕法者

臣以前件囚等並抵極法悉經殊恩或自赦文全生或因起請減等伏緣俱引霈澤累陳訴詞若非得中恐未服罪昨者一與一奪事關起請既生又死稍覺二三如臣所見伏請赦書以前所犯特許減論赦書以後所犯者不得援例庶使後無僥倖令絕披陳

請延英進對於本日卯前進狀奏

今月十三日宰臣奉宣進止自今以後欲對並令前一日進狀來者伏以延英開日羣臣皆不前知遇陛下坐時如進狀請對或令司各有要事便得奏聞今遣應對官前一

日進狀以尋常公事不假面論只且於表章足達更俟候
坐動踰數辰處置之閒便有不及以茲限約恐失事機竊
以請對官狀入之時合在平旦苟或居後則乖敬恭致令
臨事排比時有失次伏乞重賜宣示俾其曉知限以狀入
者並在卯前如在卯後聽不收覽自自然人各遵奉

商示
劾胡潛奏

左宗臆
官八
暗員
必
胡
同
姓
抵
潛
酒

戶部尚書判度支胡証准兩度勅賜爵司禦率府錄事參
軍文約各一級今月五日勅下尚書省伏以胡潛等先丁
母憂猶未終制豈得公然食邑苟竊恩榮下避三年之喪

冒受五等之爵有傷教義實敗國風臣謬跡都曹職當綜覈致興物論不敢不舉

陳商

商元和九年進士武宗朝歷官戶部員外郎司封刑部郎中史館修撰遷禮部侍郎知貢舉出歷陝虢二州刺史大中時進工部尚書

請定義安太后服制狀

皇帝爲義安皇太后服制重輕事權知禮部侍郎陳商等狀伏覲義安太皇后遺令皇帝三日而聽政十三日小祥

二十五日大祥二十七日釋服者皇帝遵奉遺旨將欲施行臣等商量事貴得中禮從順變伏以宣懿太后常奉太皇太后之令追尊徽名附配廟室今云議禮合有等差伏請皇帝降服期周以日易月之制十三日釋服其內外臣寮便以其日除釋至於所奉陵寢制度法物一事以上卽請准舊例無更降授謹具如前公卿等議大行皇太后喪禮狀

東都置太廟議

今月五日勅再議東都太廟神主廢置今臣等議者伏以

古者將營宮室宗廟爲先故詩美文王乃召司徒俾立室家其繩則直作廟翼翼雒誥曰周公往營成周十二月戊辰成王烝祭入太室裸徵之周氏文王有廟于豐成王有廟於雒卽二都得置宗廟之顯據也然兩置神主曖昧無文旣闕明徵難可臆斷臣愚輒斟酌前代以言之夫宗廟以安神神必依主故喪禮始以重爲主旣虞卽以桑爲主旣祔卽以松栗爲主神明之道不可一日無主烝嘗之本不可一日無神曾子問曰喪有二孤廟有二主禮與孔子曰天無二日土無二王嘗禘郊社尊無二上未知其爲禮

也夫煩則不敬所求惟精雖神之所適無方而神之所依
惟一求之未當神亦不歆孔聖之言蓋有深旨今東都之
主修之則非神所憑存之則無典可祭嚴祀之道豈其爾
乎稽諸異同考以經禮二都有宗廟於禮無嫌東西有神
主於理無據國家承乾開統爰法唐虞制度等威實尊文
武况東京宮廟中宗元宗所奉又是國家之別都巡幸之
時展敬有在是同周室豐雉各得建置之義以臣愚見恐
不得廢也若添修神主方著彝章既無姬漢遺文且乖禘
祫之典是同嘗禘郊社尊無二上之義以臣愚見恐不可

置也今議者或引周氏藏先公先王之主於后稷文武之廟禘嘗之時以祭薦者此是周家祧廟之主親盡而遷准禮須存以備五年再殷一禘一祫者也今國家上都主柝昭穆具存親盡已祧之主藏於祖之廟舊矣與周家之制無異鞏雒之主雖存又須崇飾以之禘祫則無文以之禴嘗則非禮存而不論則又非敬臣以東都宗廟宜如聖旨使留守李石充使增修其廟中神主不當立宜依祔粟主廢虞主之例公羊云虞王瘞之殿兩楹之間爲非人所踐躅又云瘞之廟北方者陰陽無事主亦無事今請瘞藏之

雒廟北墻下若相宅成周自可奉迎京師之主以行若歲
巡時邁自依三公攝祭庶不遺承襲之典樂言無文先也

劉從諫妻裴氏應從重典議

臣等徵諸古典周禮司寇之職男子入於罪隸女子入於
春橐漢律云妻子沒爲奴婢鍾繇曰自古帝王罪及妻子
又晉朝議在室之女從父母之誅旣醮之婦隨夫家之罰
謹按奴婢春橐罪罰之類名則爲重而非罪刑故法律名
文古今通議夫子有罪母妻無誅死之制然事出一時法
由情斷帝王刑辟豈在一途昔少卿降虜漢武誅其母元

宗時安慶宗妻榮義郡主夫以逆誅主亦賜死此則是夫
 子有罪母妻不捨之例臣等伏以從諫犬羊狼戾蛇豕兇
 殘抱逆節於明時遺禍胎於孽子裴氏為惡有素為姦已
 成分衣以固其人心申令以安其逆志在於國典情實難
 容臣等參議宜從重典

胎太常博士書

古者太常博士職以公卿諸侯大夫死第其所行舉而褒
 貶焉使世世以一二字觀其道與不道拘藜言為文武忠
 孝所以失褒也執已見為繆荒報醜所以失貶也二柄之

失博士不得職往者不得享爲政者不得道夫執已見拘
藜言是有上中下質其一二字視緡金重輕以緡金之重
輕貽後之龐微偷忠盜貞罔世閒人爲盡善加於行路皆
博士忍其過而阿其時也夫天下人望執事以爲質正然
未見有執事能針其膏肓之病者若當貶而褒當褒而貶
是猶錄跖殺夷經緯混淆者也褒而褒之貶而貶之經紀
旣著善惡懸白勸大而用微所以使後代力行不易如日
月山河江海草木四支七竅以統幹而治自從其教也於
戲博士職蓋不細願出意念慮焉

高鉞

鉞字翹之擢進士第累遷起居郎入翰林為學士知制誥
拜中書舍人進吏部侍郎出為同州刺史卒贈兵部尚書

論于頔諡疏

夫諡者所以懲惡勸善激濁揚清使忠臣義士知勸亂臣
賊子知懼忠臣義士雖受屈於生前死獲美名亂臣賊子
雖竊位於當時歿加惡諡者所以懲暴戾垂沮勸孔子修
春秋亂臣賊子懼蓋謂此也垂範如此而不能救况又隳
其典法乎臣風聞此事是徐泗節度使李愬奏請李愬勲

臣節將陛下寵其勲勞賜其爵祿車服第宅則可若亂朝廷典法將何以沮勸仲尼曰唯名與器不可以假人名器君之所司若以假人與之政也政亡則國家從之矣頓頃鎮襄漢殺戮不辜恣行兇暴移軍襄鄧迫脅朝廷擅留逐臣邀遮天使當先朝嗣位之始貴安反側以靖四方幸免鈇鉞之誅得全首領而斃誠宜諡之謬厲以沮兇邪豈可曲加美名以惠奸宄如此則是于頓生爲奸臣死獲美諡竊恐天下有識之人謂聖朝無人有此倒置伏請速追前詔却依太常諡爲厲使朝典無虧國章不柰

高鏞

鏞字弱金贈兵部尚書鈇弟元和九年進士又中宏詞科

累遷中書舍人開成中拜禮部侍郎遷吏部出爲鄂岳觀

察使卒贈禮部尚書而鏞始宜鏞之賜諡以鏞派鏞

先進五人詩賦奏之故貴安又問以鏞四女鏞

臣鏞昨日奉宣進旨令將進士所試詩賦進來者伏以陛

下聰明文思天縱聖德今年詩賦題目出自宸衷體格雅

麗意思遐遠諸生捧讀相賀自古未有倍用研精覃思磨

礪緝諧其今年試詩賦比於去年又勝數等臣日夜考較

敢不推公進士李肱霓裳羽衣曲詩一首最爲迥出更無
其比詞韻旣好人才俱美前場吟咏近三五十遍雖使何
遜復生亦不能過兼是宗枝臣與狀頭第一人以獎其能
次張棠詩一首亦絕好亞次李肱臣與第二人其次沈黃
中琴瑟合奏賦又似文選中雪月賦體格臣與第三人其
次王牧賦自立意緒言語不凡臣與第四人其次柳棠詩
賦興思敏速日中便成臣與第五人凡此五卷詩賦擢其
中科實所不愧其餘三十五人或獎舊文別錄人材非止
一途四面搜擇臣並與及第李肱舊文亦好人物絕奇每

金定全月又
卷之百二十五
八
視其闕他日必為卿相宗枝之俊實為難得况屬籍之中

讀書為文者甚少伏望聖明俯留宸覽李肱等五人詩賦
若有不堪敢受欺天之罪如或可採伺候聖心其李肱詩
賦伏望陛下聖慈特加獎飭宣示百僚以勸皇族飭修之
道臣繆忝主司不勝悽悽之誠其詩賦總為一卷謹隨狀

奉進以聞

復楊尚書汝士書

某濫司文柄以副懸旄夙夜兢惶恐遭訕謗是以搜求俊

彥冀輔聰明不敢蔽才與棠及第

齊余通 再復楊尚書汝士書

唐堯之聖也不致丹朱之賢宣尼之明也不免仲由之害

如其可化安有墜典伊祁九子盡可等於黃唐門人三千

悉能繼於顏閔若棠者自求瑕玷難以磨滅其所忤黷尊

威亦予謬舉之過也

李公佐 悉於干玉小娥亦謝即得身黑流木中

公佐元和中為洪州判官

謝小娥傳

小娥姓謝氏豫章人估客女也生八歲喪母嫁歷陽俠士

段居貞居貞負氣重義交遊豪俊小娥父蓄巨產隱名商賈閒常與段壻同舟貨往來江湖間小娥年十四始及笄父與夫俱爲盜所殺盡掠金帛段之兄弟謝之生姪與僮僕輩數十悉沉于江小娥亦傷胸折足漂流水中爲他船所獲經夕而活因流轉乞食至上元縣依妙果寺尼靜悟之室初父之死也小娥夢父謂曰殺我者車中猴門東草又數日復夢其夫謂曰殺我者禾中走一日夫小娥不自解悟常書此語廣求智者辯之歷年不能得至元和八年春余罷江西從事扁舟東下淹泊建業登瓦棺寺閣有僧

齊物者重賢好學與余善因告余曰有孀婦名小娥者每
來寺中示我十二字謎語某不能辨余遽請齊公書於紙
乃憑檻書空凝思默慮坐客未倦了悟其文令寺童疾召
小娥而至詢訪其由小娥嗚咽良久乃曰吾父及夫皆爲
賊所殺邇後嘗夢父告曰殺我者車中猴門東草又夢夫
告曰殺我者禾中走一日夫歲久無人悟之余曰若然者
吾審詳矣殺汝父是申蘭殺汝夫是申春且車中猴車字
去上下各一畫是申字又申屬猴故曰車中猴草下有門
門中有東乃蘭字也又禾中走是穿田過亦是申字也一

日夫者夫上更一畫下有日是春字也殺汝父是申蘭殺汝夫是申春足可明矣小娥慟哭再拜書申蘭申春四字於衣中誓將訪殺二賊以復其冤娥因問余姓氏官族垂涕而去爾後小娥便爲男子服傭保於江湖閒歲餘至尋陽郡見竹戶上有紙牒子云召傭者小娥至應召詣門問其主乃申蘭也蘭引歸娥心憤貌順在蘭左右甚見親愛金帛出入之數無不委娥已二歲餘竟不知娥之女人也先是謝氏之金寶錦繡衣物器具悉掠在蘭家小娥每執舊物未嘗不暗泣移時蘭與春宗昆弟也時春一家住大

江北獨樹浦與蘭往來密洽蘭與春同去經月多獲財帛而歸每留娥與蘭妻梁氏同守家室酒肉衣服給娥甚豐或一日春攜大鯉兼酒詣蘭娥私歎曰李君精悟元鑒皆符夢言此乃天啟其心志將就矣是夕蘭與春會羣賊畢至酣飲暨諸兇既去春沉醉卧于內室蘭亦露寢于庭小娥潛鑊春于內抽佩刀先斷蘭首呼號鄰人並至春擒於內蘭死於外獲賊收貨數至千萬初蘭春有黨數十暗記其名悉擒就戮時尋陽太守張公覲喜娥節行列聞廉使旌表乃得免死而已元和十二年夏娥復父夫之讐畢歸

本里見親屬里中豪族爭求娉娥誓心不嫁遂剪髮披褐
訪道於牛頭山師事大士尼蔣律師娥志堅行苦霜春雨
薪不倦筋力十三年四月始受具戒於泗州開元寺竟以
小娥爲法號不忘本也其年夏五月余歸長安途經泗濱
過善義寺謁大德尼令操見新戒者數十靜髮鮮帔威儀
雍容立侍師之左右中有一尼問師曰此郎豈非洪州李
判官二十三郎者乎師曰然曰使我獲報家讐得雪冤恥
是判官恩德也顧余悲泣余不之識詢訪其由尼白師曰
名小娥頃乞食孀婦也判官時爲我辨申蘭申春二賊名

字豈不憶念乎余曰初不相記今卽悟也娥因泣具寫記
申蘭申春復父夫之讐志願相畢經營終始艱苦之狀小
娥又謂余曰報判官恩當有日矣豈徒然哉嗟乎余明辨
二盜之姓名小娥又能竟父夫之讐寃神道不昧昭然可
知小娥厚貌深辭聰敏端樸鍊指跛足誓求真如爰自入
道衣無絮帛齋無鹽酪非律儀禪理口無所言後數日告
我歸牛頭山扁舟泛淮雲遊南國不復而遇君子曰誓志
不舍復父夫之讐節也傭保雜處不知女人貞也女子之
行唯貞與節能終始全之者如小娥足以儆天下逆道亂

常之心足以勸天下貞夫孝婦之節余備詳前事發明隱
文暗與冥會符於人心知善不錄非春秋之義也故作傳
以旌美之

狄兼謨

兼謨字汝諧并州太原人第進士歷蘄鄧鄭蘇四州刺史
以治最擢給事中遷御史中丞累遷尚書左丞領天平軍
節度使辭疾以祕書監歸洛陽遷東都留守

請編次建中以來制勅奏

伏准今年正月日制刑法科條頗聞繁冗主吏縱捨未有

所徵宜擇刑部大理官卽令商量條流要害重修格式務
於簡當焚去冗長以正刑名者伏以律令格式著目雖始
於秦漢厯代增修皇朝貞觀開元又重刪定理例精詳難
議刊改自開元二十六年刪定格令後至今九十餘年中
外百司皆有奏請各司其局不能一秉大公其或恩出一
時便爲永式前後矛盾是非不同吏緣爲姦人受其屈伏
見自貞元已來累曾別勅選重臣置院刪定前後數四徒
涉厯三十載未堪行用今若只令刑部大理官商量重修
格式遽焚冗長伏恐姦吏緣此舞文伏請但集蕭嵩所刪

定建中以來制勅分明比類刪去前後矛盾及理例重錯者條流編次具卷數聞奏行用所刪去者伏請不焚官同封印付庫收貯仍慎擇法官法署省等所斷刑獄有不當者官吏重加貶黜所冀人知自効吏不敢欺上副陛下哀矜欽恤之意奏請各府其有不當一重其公其效思出一

請覆勘吳士矩罪狀奏縣令刺史觀察使皆陛下守土之臣守陛下土地財物行陛下教條恩澤而已非得盈縮自己與奪自專况軍戎事不可容易添給添給之後損減至難豈唯一道一軍之弊

實江淮十餘鎮聲聞相傳如或引例其若之何吳士矩恐
須勘驗取實以窒定江淮十鎮之意日月無私昭雷霆無
私怒陛下獎任士矩本非私也今負陛下而理之亦非私
也臣忝憲職不敢尸祿其吳士矩請付東臺差清疆御史

就江西推勘聞奏

王叡著爰轂子三卷

爰轂子曰夫兵者凶器戰者危事自古聖王不得已而用

之仗德而行則湯征葛乃爲帝王若恃力而戰則紂放牧
野終罹戮辱春秋傳曰兵之設久矣聖人以興亂人以廢
廢興存亡昏明之術皆兵之由也復曰文不犯順武不違
敵蓋軒轅五十二戰義在惜民湯武七十二征本惟靖難
且文而不武武而不文不可謂雄則文臣在聰明器量鑒
人別材故曰文雄可以爲相武臣在俊傑深沉果敢決斷
故曰武雄可以爲將二畧兼濟則可以入爲相運籌於廟
堂之上則可以出爲將折衝於萬里之外然而將相之務
在見有才力者賞之愚詐者去之如有才力者不賞則忠

烈疑而不進愚詐者在傍則讒邪黨扇而爲欺如此行之
則何功而不立何罰而不行何才而有遺何戰而不勝孔
子曰我戰則克祭則受福又曰不教民戰是謂棄之如兩
軍交鋒之際列兵無陣由人民居而無城池立而無牆塹
寇盜衝擊則何以捍禦譬如蹴鞠較力猶設機便以護手
足況有兵而無隊伍有隊伍而無行陣有行陣而無奇正
有奇正而無權變起自黃帝命其臣風言演之本文不越
一百字詞約旨微非聖賢莫能研究上公起襄孫吳韓項
並由斯術唯孔明尤盡其妙生之於心機不形之於文義

雖君臣父子不相傳授近者李筌圖載八陣只言或合而
爲一或離而爲八不陳四奇變化之旨不顯天衡地軸衝
翼之文將帥覽之難曉今剗畫天地二陣圖明八陣八變
之源燭火助陽自忘短綆庶幾英傑覩之稍裨焉

將略論

炙轂子曰昔祝其之會仲尼云夫有文德者必有武備遂
斬萊人頭足異處故曰文武之道未墜於地是以古之儒
者服縫掖之衣頂章甫之冠佩環玦負櫜劍近代文儒恥
言兵事苟或議及則僉謂之兇人今以翠華去艷鎬黃屋

軫堯心率土之濱莫寧啟處方可論兵粗議將畧矣且自
惟亂以來儒道旣息武弁是崇然而將帥多以勇力爭強
少有精練兵機而懷謀策者所謂以強凌弱以眾暴寡迭
相吞噬適足以塗炭生靈構怨結禍夫兵之成敗在將帥
之器能各有限劑須定等差淮陰侯與漢高祖論絳灌以
下用兵多少信曰陛下可將十萬眾所謂能將將不能將
兵夫高祖之雄才大略尚如此况其下哉楚子玉賢大夫
也亦不能越三百乘是以王翦能將六十萬而李牧不能
二十萬此方見將帥才器之大小也凡爲將料敵之情僞

而後決策制勝須知彼師之能否乃操我之所長假如韓
信能設伏走戎則逐奔不遠難誘也從襲不及難陷也白
起能攻城野戰則當深溝高壘以挫其銳俾蜂蠆無所施
其毒螫虎狼不能逞其爪牙本謀既壞伺其殆隙而擊之
因變竒正以待敵整衡軸以攻險兵法曰始如處女敵人
開戶後如脫兔敵不及距此兵之要也司馬宣王曰諸葛
孔明志大而不見機多謀而少決好兵而無權雖提卒十
萬已墮吾計中破之必矣及鄭褒亦能知母邛儉好謀而
不達事情文欽勇而無算至儉兵敗皆如其言又潘濬見

樊伯爲武昌從事與州人設饌十餘度自起比至日中可
得知以兵五千足以擒之果在濬之度內漢王謂魏大將
軍栢直口尚乳臭不能當韓信謂騎將馮敬雖賢不能當
灌嬰謂步將項它不能當曹參吾無患矣乃使韓灌曹三
將軍果大破之後魏高祖宏曰青齊之兵可以禮遇徐兗
之卒理須義撫斯測度將卒之明驗也今之將帥多不自
量其才器又不知彼之短長率爾合戰卒然求勝由聚卵
以擊山驅羊而鬪虎欲期弭兵靜亂不亦難哉帝王宜開
英鑒審將帥之器量文武之才則崇勲大業庶幾可立夫

宰制山河剽割疆宇舉大綱則易定滋苛細則難安故子
房佐漢畫大謀六七件遂定天下孔明勅蜀決沉機三二
策遽成鼎峙英雄之大畧將帥之宏規也安危之機存亡
之要審諸將畧可見徵焉卒之間劍水今之雜响矣不自

雜軍果三惑論 餘賦高卧定曰青夜之兵可以

災穀子曰漢史載楊秉能三不惑歷代以為美也然三惑
之中利病各異論曰夫惑於酒者敗賢能損道德廢家業
顛狂致疾生於身軀夭折壽考故須戒於過度也且阮籍
劉伶陶潛畢卓皆惑於酒悉無所成至於得溺酒名而已

夫惑色者壞禮樂損門風傷殘形骸耗蠹金帛怨雖不斂
於夷夏政且有妨於霸王齊桓內寵如夫人者六姬外嬖
監貂雍巫衛靈同斛浴者三人內愛南子外淫彌瑕之類
是也夫惑於財者小則亡身破家大則辱先滅國聚鹿臺
之錢積巨橋之粟剖胎拾卵惟利是求盜璧攫金刑戮不
懼而又必厚於已而薄於人則義不及於宗親恩不加於
左右如此必不得人心而失眾情孟子曰推恩足以保四
海不推恩不足以保妻子故君視臣如手足則臣視君如
腹心書曰撫我則后虐我則讐斯之謂也苟專利矣則嘉

言令猷弗得聞矣過謬錯誤莫得知矣近侍者傳刃以懷
憾疎遠者聚謀而待豐憾豐一發身首分離傳曰象有齒
以焚其身賄故也又曰匹夫無罪懷璧其罪則三惑之甚
其在茲乎昔漢高祖使隋何說黥布歸漢布既謁漢王佶
慢布悔來欲自殺及就舍供帳與高皇帝乃大悅燕
丹之奉荆卿也子女玩好恣其所欲然後渡易水不以爲
寒刺秦王視死如歸夫黥布荆軻雄傑之士也猶以服饌
聲色變以移志况今將帥仕伍乃中才之士乎若不結之
以信義厚之以恩膏彼安肯效命死節爲貪鄙恠齋之主

哉故士有言曰爾之財賄尚惜我之性命詎可輕捐古語
云使人造舟車猶豐酒食冀彼竭機巧則舟無毀溺之患
車免顛覆之憂今驅策賢能駕御英傑飾甘言以誘掖矯
禮貌以卑和欲其盡赤誠竭計策其用飴蜜以誇賺嬰兒
曾不知聰明之士見其肝膽鏡其詐僞亦持虛以待虛設
詐以禦詐國士遇我我以國士報之衆人遇我我以衆人
報之項羽玩印賢豪叛去曹公慢易天下鼎分是知三惑
之中酒者致之可矣色者放之可矣財者下愚之醜行也
致放逐刑戮所宜加投畀豺虎投畀有昊以謝乎衆矣

誠節論

炙轂子曰漢史著誠節立名之士謂其能執一不回死義不顧雖湯鼎之威霜刃之刑不能脇之故節義彰明顯於後世存無愧於英俊沒無畏於神靈蕩蕩然偃於暗室之中堂堂然行於日月之下卓爲人傑乃有節有義之士也夫能如此者亦賢哲之一體客曰誠如是無乃滯於變通而能成功則拙仗節死義可矣旣不能仗節死義又不能變通成功此謂之偷生無恥之夫昔李陵降匈奴又要成功致老母伏誅妻子棄市斯始規變通而終爲負義且臨

患難履顛危雖商賈小人屠沽賤品猶能相拯於窮蹙尚
乃任情於依托矧乎頂章甫冠拖縫掖衣口誦先聖之文
胸懷德義之典目曰儒士而無慷慨之心不有風雲之操
亦何以見分明之男子磊落之丈夫昔如敬通不修廉隅
杜篤請求無厭班固諂竇以作威馬融黨梁而黷貨丁儀
貪婪而乞賄路粹哺啜而無恥皆文儒之所賤貞介之所
羞夫士無信不可以立身無義不可以立名無節不可以
成功無忠不可以成事四者不懷則情同犬豕行比豺狼
安足以齒於人倫哉客曰先生斯論不亦傷於嫉惡太甚

乎對曰嫉惡不甚則好善不篤若見惡不能去則邪佞之人羣臻知善不能用則賢良之士引去苟懷誠節安得不嫉諂諛今公卿席客蔭馮諼毛遂之忠誠侯伯幙賓肆李園祖珽之欺詐或受賄賣主奉越以事吳或首鼠兩端觀成而望敗窮其操心姦宄遽際戚施與夫誠節之士執一不回死義不顧者亦何遼廓論未已客曰若夫先生之論誠亦富茂迺斂衽而退士而無刺刺之心不齊風雲之異

崔俊

俊元和十五年官戶部侍郎判度支

請令本州定稅額奏

淄青齊海鄆曹等三道及澉蔡申光等州勘定兩稅錢物斛斗等奉今年正月二十二日勅前件州郡久陷賊廷將定差科切在均一宜令度支郎中趙侁專往與所在觀察使刺史審實勘定聞奏伏以道路遙遠准旨條夏稅六月一日起徵若待使回覆奏卽蠶桑已過徵稅失時制使或臨又頗勞擾伏請各委本州刺史審量物力約舊配額比類隣州徵稅輕重及土地物產厚薄定兩稅錢物斛斗類並具送上都及留州刺史等額分析聞奏務使平允不得

令已後致有申論

限陳史等限令林國表等限

賤朝俄婦蘇豐重又土此此其孰孰玄兩所送此慎水

謂又賦也對於諸各委本陳陳史審量此伏除書

一且賦也對於諸各委本陳陳史審量此伏除書

對陳史審量此伏除書

宜令其史腹中賦書

檢卡等奉令平五凡二十二日故前於此

留書或或揮曹等三並又斯茲申尖等

肅令本陳史蘇蘇

欽定全唐文卷七百二十六目錄

崔嘏

授令狐定右散騎常侍制

授崔疇等給事中等制

授李方右諫議大夫等制

授姚勗右諫議大夫等制

授李訥中書舍人李言大理少卿制

授裴諗中書舍人制

授裴諗知制誥制

授崔瑤等起居郎制

授裴諗司封郎中依前充職制

授蕭鄴翰林學士制

授宇文臨翰林學士制二首

授沈詢翰林學士制

授崔蠡尚書左丞制

授盧宏宣工部尚書制

授盧懿吏部郎中制

授韋博司勳郎中等制

授馮韜司封員外郎等制

授宇文臨禮部員外郎制

授李隲祠部員外郎等制

授李渾比部員外郎等制

授高宏簡司門員外郎判度支案制

授蘇彰屯田員外郎制

授溫璋侍御史制

授盧就等侍御史制

授李種韋澳裴達殿中侍御史等制

授鄭韜殿中侍御史制

授蔡京趙滂等御史等制

授蕭鄴李元監察御史制

授李毗集賢校理等制

授楊魯士長安縣令等制

授盧攸河南縣令等制

授蔣邕濟源縣令制

授元壽陸渾縣令制

授紇十泉江西觀察使制

授鄭亞桂府觀察使制

授李德隴州刺史兼防禦使制

授薛廷範淮南副使制

授盧戡桂州副使制

授鄭齊之靈武副使制

授鄭公輿鎮州副使等制

授田密相州長史等制

授王叔政洪州別駕等制

授崔郁南鄭縣令等制

授李瑤雲陽縣令等制

授高元裕等加階制

授內諸司及供奉官敘階制

授韋慤裴識等加階制

授李駢等加階制

授孫簡等加階級制

授盧宏正等加三品階制

授內官加階爵制

封石雄妻索氏涼國夫人制

封竇澣等毋邑號制

授韋正貫京兆尹制

德業五貫
德業五貫
德業五貫
德業五貫
德業五貫

欽定全唐文卷七百二十六

崔嘏

嘏字乾錫舉進士復以制策歷邢州刺史改考功郎中擢
中書舍人李德裕斥為崖州司戶坐書制不深切貶端州
刺史

授令狐定右散騎常侍制

勅前西川節度副使令狐定夫言語侍從之臣朝夕論思
獻納必求明誠端厚文而不佻者以備吾之顧問今以定
業茂儒素道光縉紳恬於晉取之機鬱有貞方之譽踐歷

金定全唐文 卷七百二十六
一
華貫周旋正途佐台席而籌畫居多登副車而聲猷甚暢
從知既久畢志方歸嘉其委質之誠寵以附蟬之貴阮貂
換酒潘直逢秋既榮高閣之居亦有達人之美勉思清切
以遂優游可依前件

授崔壽等給事中等制

勅瑣闥冠三省之高奉常列九寺之右凡所選擇必俟才
賢惟爾壽以賓筵雅度早踐霜臺儔以正殿雄詞超昇省
署文雅當於題柱列郡洽於褰帷迭居貳尹之雄並處亞
卿之列而皆本以明敏發爲文學玉在涅而不緇金投火

而彌勁卷言久次是用遷昇我有絲綸期汝論駁我有金
石資爾諧和無忝官常自貽公讓壽可給事中儔可太常
少卿

授李方右諫議大夫等制
勅居諫納之地副銓綜之司致予聰明適彼倫要自非端
方正直之士檢身御眾之才則何以輸及雷之忠誠奉提
衡之藻鑑爾等皆擢秀瑤林飛華桂苑早登俊造共許清
貞入憲府而自竦孤標歷文昌而更光列宿分符茂績遠
繼於龔黃視草雄詞舊推於賈馬是用擢居右省陟彼首

曹爾宜徵五諫之司佐三銓之任無疑逆耳必在精心勉
服寵光益揚善價可依前件昌而更長以副公孫文獻

授姚勗右諫議大夫等制

勅朕高居穆清端拱思理尚慮旒纁蔽吾聰明故精求諫
納之臣投我藥石之語而天官正郎地連藻鏡職佐銓衡
必資明幹之才以副經通之目以勗端方雅厚正以操心
以簡求和易周旋敏於臨事而皆富文奧學早昇俊造之
科利用長才累處重難之任是用擢於粉署置在禁垣昇
自外郎膺茲首選爾其詳求五諫左右三銓勉思及雷之

忠更致提衡之美勗可右諫議大夫簡求可吏部郎中

授李訥中書舍人李言大理少卿制

勅禮部郎中知制誥李訥等彰施帝載潤色王猷朝出乎
九重夕馳於四表必資其金相玉立之器懷其騰蛟吐鳳
之才以發揮人文流布天澤而臯繇作士暮明以贊至理
定國持刑公平而昌後嗣使匹婦無實霜之嘆遐眎離東
溼之冤陰陽氣和手足可措必在乎理獄之官明慎用刑
哀矜守法今訥言等皆以器能犀利文彩光華演綸推倚
馬之工剖竹著懸魚之化以茲遷擢誰曰不然勉吾右文

恤刑之意也訥可守中書舍人言可大理少卿

授裴諗中書舍人制

勅居禁密之地聞善則遷當演綸之工有勞斯陟此所以
光吾侍從榮彼縉紳翰林學士司封郎中知制誥裴諗家
承茂勲身有羶行早襲弓裘之業克隆堂構之基間澹自
居囂浮不染自擢居內署掌茲制命謹密無曠馨香有聞
問對備見其一心敏捷共推其七步况臧孫有後且聞得
鳳之音枚乘多才雅蓄雕龍之妙爰因滿歲授以正名爾
宜思宏用以致君勵精誠而正己慎爾聞見奉吾周旋無

彰溫樹之名克保詞林之美可依前件

授裴諗知制誥制

勅傳曰有功德於人者其後必大伊爾烈考勤勞王家出
有平寇之功入有致君之志式多令嗣以承清基惟爾諗
生而有文弱不好弄中蘊明敏外涵清和藹然君子之風
蔚有賢人之操自擢昇翰苑入侍禁闈勲必知機靜而適
道大玉之韻清越以長小山之姿貞芳自茂是用資其粉
澤演我絲綸斧藻方耀於鳳銜揮灑更期於鴻筆式光帝
載無鬱王猷可依前件

授崔瑤等起居郎制

勅載筆赤墀之下掌禮曲臺之中注記行而鉛槧是資褒
貶當而縉紳知懼顧茲所職豈易其人而擢備宮僚亦爲
佳選以瑤貞規素履紹克儉之家風以碣秀質清門承定
傾之祖德以瞻雄詞麗藻躡珠履於賓筵以景表退跡安
時寄霜華於憲署我之自得爾亦薦聞各膺寵擢之榮自
有雲霄之路可依前件

授裴諗司封郎中依前充職制

勅臺郎望美詞苑地高粲列宿之輝華參起草之宥密自

非風儀玉立器宇川停摛揆天之雄文蘊擲地之清韻則
不足以膺我妙選爲時美談翰林學士考功員外郎裴諗
襲慶于門騰芳戴席端莊抱吉士之操謹默得賢人之風
灼若春華皎如瑞素自擢居文囿參侍瑤墀進對益見其
周詳詞旨不離於雅厚是宜仍金鑿之舊職榮粉署之新
恩保乃休光更流芬馥可依前件

授蕭鄴翰林學士制

勅監察御史蕭鄴吾內有宰輔重德作爲股肱外有侯伯
虎臣用寄藩翰至於參我密命立於內庭卽必取其器識

宏深文翰道麗動能持正靜必居中指温樹而不言付虛襟而無隱此所以選翰林學士之意也前此數者鄴皆有之是用拔於羣倫寘在親近勉爾端行副吾精求可依前件

授宇文臨翰林學士制二首

勅吾方以文化天下期於太和故左右侍從之臣詞林宥密之地必求其性識宏茂文藻道麗以備顧問以參周旋聞爾清直無徒雅厚自處富有天爵蔚為詞人是用輟自儀曹置於翰苑惟端靜可以承渥澤惟敬慎可以期遠圖

資爾令猷副我殊選可守本官充翰林學士

其二

勅禮部郎中宇文臨吾外有輔臣以匡大化中有股肱以
總樞機而發揮絲綸叅侍顧問司我耳目廣予腹心惟是
東求擢居近密以爾詞賦清才珪璋雅韻抱孤貞以適性
竦端介以操持處眾流之中不爲自異居慎獨之際克念
無私由是選自文昌昇於翰苑爾宜一心以奉職勤百慮
以省躬勿怠疏遠副吾恩顧可守本官充翰林學士

授沈詢翰林學士制

勅右拾遺集賢殿直學士沈詢參宥密之命處侍從之地
居可以備選用於他年動可以承顧問於此日不獨取文
翰道麗之才亦必求孤貞雅厚之士惟乃祖在建中初以
懿文奧學司我元良乃父當元和中以清規茂行典我文
誥能流積善之風鍾爾挺生之秀是用思彼前德擢於後
來置在禁闈光我詞苑爾宜勤其身以勞夙夜宏其用以
新志業無俾枚臯嚴助之流獨承榮於漢帝况職當視草
官列諫垣宜思及雷之忠更潤演綸之美可守本官充翰

林學士

贈爾其松巖百中本官充翰林學士

以

授崔彛尚書左丞制

勅提六聯之紀綱總一臺之樞要自非才識兼茂風標峻
整則何以統攝羣吏肅清眾官前天平軍節度使崔彛軒
裳積慶文學藻身黃鍾涵待扣之音青萍蓄善割之利早
分列宿獨膺題柱之榮入踐禁闈共許演綸之美累居重
任亟換名藩貢籍銓衡必登於藻鑑觀風馭眾益顯其長
才廉車扇愷悌之仁將席蘊韜鈴之畧情惟戀闕志在推
賢詞必由衷事多餘美顧我任才之意當爾受代之辰言
念前勞載加新命爾其瑩秦臺以分美惡操漢律以檢尤

違必俟端標用分曲影可依前件

授盧宏宣工部尚書制

勅朕嗣膺寶位繼統洪業思與藩方大臣披其雲霧况中外遞遷勞逸更處當用才之日急病是思及求舊之時任賢斯切而中臺為政理之本冬卿亦統任之基方藉舊僚以裨新政前易定節度使盧宏宣自薊門陷戎爾以舊族遷于洛京惟是冠昏喪祭之儀禮讓敬恭之則推於四姓耀此一門而能自以文業吏師馳驅當代歷踐華顯載茂休嘉累登齊壇常領京邑功有成效人無間言及罷將軍

之麾幢解刺史之印綬來朝絳闕益見丹誠是宜正彼六
聯昇于八座曳文昌之履通秘殿之香更增北斗之光輝
或重南宮之喉舌承我休命爾其敬哉更效寒心其良

補益左授盧懿吏部郎中制其有獻慕畫日

勅河南少尹盧懿總天下之缺員必先閱於吏曹郎然後
達於銓官自非神機穎利識用周密則不得備於斯選也
以爾詞鋒絢練門緒清華儒席許其溫恭士林推其端厚
自分曹洛汭貳尹三川澹於趨進之途鬱彼靜專之操晦
跡而囂浮自遠長鳴而風雨不渝是用徵還首曹榮以題

柱必能佐持衡之重任聯藻鑑之清輝勉服官常無孤所
舉可依前件

授韋博司勳郎中等制

勅韋博等頃以邊城命將肇建麾幢當警塵未息之時及
烽火尚明之日故於粉署妙選星郎欲以贊充國屯田之
謀佐武賢備戎之術既而賓筵有耀幕畫已多薦居於沙
漠之中芟舍於戎旌之下亦既勞績亟更歲寒念其裹革
之誠更復握蘭之美而煥本以文學傳之吏能克踐正途
久高宗祏今以三農務急九扈才難宜遷丞副之榮用陟

亞卿之列無忘素履各服新恩可依前件

授馮韜司封員外郎等制

勅分列宿之位應覆被之榮入可以封還詔書出可以分
領符竹優游於粉署之內談笑於錦帳之前苟非清才不
在斯選以韜文章炳煥獨步詞科以同靖門胄光華深通
聖典荆玉韜含章之美霜鐘蓄待扣之音是用升彼名曹
擢於芸閣文昌之地職業非輕式佇彌綸更期遷陟韜可
司封員外郎同靖可金部員外郎

授宇文臨禮部員外郎制

勅凡在南宮必資望實而儀曹之選益難其人以爾松篁
清韻瓌璧貞姿以文章爲積行之基用規檢爲修身之具
飾外以舉其衆能居中自持其謀益佐雲幕而鬱有佳聲
處霜臺而介然獨立玉墀之下益振金相載筆之間共推
直史是用遷于粉署光彼文昌勉膺起草之求無忝握蘭
之美可依前件錄置之內始笑於離卿之節者非散木不
能久候授李騰祠部員外郎等制又佳選前書世取必不
勅由憲府而入文昌自藩方而昇粉署旣爲佳選亦舉滯
才爾等皆以文藻發身馨香馳譽早茂閨門之行久從賓

幕之遊或賜告經時頗積退藏之美或綱丞上請雅膺選
擢之科祠膳清曹省闈右也勉思起草無念應星隲可祠
部員外郎陟可膳部員外郎

授李渾比部員外郎等制

勅著作郎李渾等台庭積慶文苑馳聲玉讓其溫華山挺
其芳茂幼聞詩禮在家推鯉也之賢夙稟清英行已有藹
然之舉蓬邱探討蓮府周旋頗聞編軸之功雅得副車之
體綱曹妙選粉帳華資方承綵服之榮共許應星之美爲
郎匪因於父任題柱自奏於帝知勉服鴻休更觀驥騁可

依前件

授高宏簡司門員外郎判度支案制

勅司國計者統天下之財貨量入以爲用在於賦有餘也
事歸一途故必取其疆力多聞分掌簿籍俾操剗無滯精
明莫欺宏正上言以爾嘗居憲署亦領郡符通於吏術素
傳儒業是可以分列宿之位理聚人之財爾其佐我才臣
資於國用無俾健酷以罔遺利可依前件

授蘇彰屯田員外郎制

勅具官蘇彰嘗以藝能再昇憲府聞其奉使亦甚稱職往

來萬里勤勞一心而卧疴經時賜告逾歲遷居粉署用應
星文勉思覆被之榮無忝握蘭之美可屯田員外郎

授温璋侍御史制

勅大理丞温璋朝廷用人不獨取名聲暢茂曹唱羣和而
命之至於御史府尤藉才能以責官業前時陰率眾吏構
成姦謀焚我帑聚其主事以火事上聞付于理寺而璋於
羣疑之中獨出明見比令左驗事則果然此真憲府之任
也俾戴豸冠仍加朱紱勉思奉職無忝我用才之意可依
前件

授盧就等侍御史制

勅前義武軍節度判官盧就東川節度判官爾朱杭等侍
御史居其府則掌領推按糾繩愆尤立於朝則正其視瞻
峻彼風範官號清重才資鯁直拔而用之不在階級爾就
爾杭立身有文能用嘉猷叅于將席憲丞上請咸曰得人
嗚呼神羊在庭屈軼在砌觸邪指佞二物可師無爲畜縮
以孤我誠臣之舉可依前件

星文

授李種韋澳裴達殿中侍御史等制

勅右拾遺李種等御史府有三院凡所選用其器得以專

達必取其剛廉勁健才行兼至者則可奏而授之今種樸
重有文直而不許司我諫納宏益仍多以澳洎達成用詞
學器識累參賓畫研朱益丹瑩玉無玷皆可以修明憲職
振凜霜標屈軼有靈獬豸不懼惟此二物爾其師之可依

前件

授鄭韜殿中侍御史制

勅監察御史鄭韜御史府三院轉遷雖曰彝制至於用捨
進退亦繫於一時之事迹以韜立志甚賢居官稱職霜簡
在手風標竦身其長吏言請用遷陟班我殿內升爲近臣

屈軼神羊無怠前志可依前件

授蔡京趙滂等御史等制

勅監察御史蔡京忠武軍節度副使趙滂桂管副使鄭魯

洎陳許觀察判官薛蒙等朝廷之選御史雖委其長吏得

以專舉然亦詳求物議然後取舍無私憲丞上言滂與魯

洎蒙皆業於儒術傳以吏道其剛明勁果可委以擊斷其

溫敏莊肅可資其檢繩而皆久滯藩方未昇朝序吾且循

其聲跡頗契符言是用擢自賓筵置於憲席而京再覆大

獄吏不敢欺滿歲當遷吾何所恡京可殿中滂可殿中魯

洎蒙並可監察

授蕭鄴李元監察御史制

勅御史府居朝廷之中傑出他署蓋以圭表百吏糾繩四方故選其屬者必在堅明勁峭臨事而不撓不獨取謹厚温文修整咨度而已爾等皆以詞華升于俊秀從事賢侯之府馳聲館閣之中籌畫居多操持甚固是宜持此霜簡峻其風標使避馬之謠不獨美於桓典埋輪之志無所愧於張綱勉服寵榮無忘職業可依前件

授李毗集賢校理等制

勅秘書正字集賢校理李毗等披書殿讐校之文秉東觀
鉛黃之筆必選其雄詞擲地敏學通天者而授之爾等皆
以後來之英前達所許人推領袖名於縉紳或荆山蘊片
玉之姿或桂樹擇一枝之秀五常師於中道萬里視其長
途况我台臣監領二職以爾上請是謂得人宜思結綬之
榮各勉分飛之勢推輪覆篲其在茲乎毗可藍田縣尉充
集賢校理澣可興平縣尉直史館

授楊魯士長安縣令等制

勅兵部郎中楊魯士等朕方以親人之任重其守宰欲使

中外迭處周旋可觀至今於尚書省御史府以時序遷者亦皆推於公議復中念孔門以政事文學列爲四科而魯士等各擅其能久而益勵付之劇縣分以名曹必能展剖繁析滯之才副題柱含香之美且有後命爾其敬哉

陳大升授盧攸河南縣令等制

勅前知嘉興監盧攸前知湖南院韋宙等國朝之制自外府正郎至於郡丞半刺不由會府之所選授者中外臣僚歲終得以聞薦而有司鍛鍊其簿籍參校其資級夏五月各以其名來上惟爾攸等或以文學再登科第或以才人

欽定全唐文 卷七百二十六
早居賓幕或以利用累司權筦之繁或以薦延久佐州邦
之理嘉乃成績俾其敘遷至於赤縣銅印之榮三川綱轄
之任皆吾之慎選也爾其勉之

授蔣邕濟源縣令制

勅夫任事之官親於人者莫切於令長也非其才則百里
告病得其人則元元獲安况授其臣在乎所舉獻狀推允
用觀爾能邕可河南府濟源縣令餘如故

授元壽陸渾縣令制

勅右補闕元壽縣令親人之任在昔為難况我每念疲毗

思於共理爾有利用可爲此官宜輟任於諫垣俾足才於
宰邑解牛利及來鹿殊祥勉思三異之能無忽百里之地
可陸渾縣令

授紘于泉江西觀察使制

勅鍾陵奧區楚澤全壤控帶七郡襟連五湖人推征賦之
饒俗擅魚鹽之利靜則易理動則難安思得良能以臻富
庶選求之下是舉僉諧中書舍人紘于泉氣惟雅茂才實
變通黃鍾涵待扣之音青萍蓄善割之用早以俊造播其
馨香霜臺竦介立之標蘭省蔚和光之操洎司綸綽益茂

聲猷粉澤惟工克贊鳳池之美溫華自潤皆推鴻筆之資
蘊商也之文可以華國布求也之政可以觀風是用輟於
演綸付之廉問必能宣我大化蘇其遠人佇聞來暮之謠
必有借留之思爾其簡以臨眾清而自持惠養益厚於疲
羸操斷無遺於桀驚一方之任不愧於前賢五字之精永
光於禁掖仍加中憲式峻外臺可江西觀察使

授鄭亞桂府觀察使制

勅地連五嶺川東三江直千里之奧區雜夷風之阜壤靜
則可理動則難安思得長才以綏裔俗求於僉論多曰汝

諧給事中鄭亞識洞古今情惟端愿富三冬之精學控六
變之雄文早昇甲乙之科雅有詞華之譽周旋粉署堂堂
表題柱之榮糾正霜臺肅肅有埋輪之志人推長者時許
多能洎入贊黃樞超居青瑣彌縫闕漏袞職以之無遺參
酌憲章國典由其益振朕方宏理道志切惠人精求廉問
之才用廣移風之化爾宜將我誠意布其惠和撫俗必務
於潔廉奉已宜思於簡儉無以地遠而忽其簿書無以官
尊而怠於統馭將期富庶必在嚴明承我寵榮勉思報効

授李儆隴州刺史兼防禦使制

勅隴陝之西地連番境雖舅甥和好絕塞無虞而邊徼撫
循長才以藉爾武能禦寇智可圖功早推奉國之誠共許
統戎之畧及位分六校職長千夫爾彰夙夜之勞益盡爪
牙之用是思寵擢委以疆場爾宜推赤心以任人勵元甲
而訓士約以奉已忠以報君無興踴虜之功更起事邊之
計靜能制動安亦慮危勉而行之富貴可保將表戎旌之
盛仍兼專席之榮可隴州刺史兼御史大夫充本州刺史
防禦使

授薛廷範淮南副使制

勅考功郎中薛廷範等吾命重臣往鎮淮海其所選署賓
僚得以參用朝列伊爾廷範為時所聞可昇天子之堂早
入賢侯之幕周旋不忘乎中道出處必踐其正途輟茲考
績之能俾倅戈旃之盛爾能以侍君之道以奉帥則無往
而不適矣惟孜與之之鄆之舊僚也能以通方佐成茂績
至今庸蜀人多懷之於參佐計司主領院務統兩地之
權筦專五銖之鎔造各從其請以展良能勉副已知用光
所舉可依前件之至矣吳偏車首覽之

授盧戡桂州副使制

勅前江陵縣令盧戡等藩方之命案察雖得以上朝廷亦
擇其可者而授之至於昇副車首賓席自非賢才孰充佳
選戡尚義有聞積學多識去前榮進樂在閑放以是為請
宜乎得人由山立而下成遂於此發為官業或以詞藻蔚
彼雋髦各從所適之宜以廣用人之途銀章赤紱耀彼華
筵可依前件

授鄭齊之靈武副使制

朕以靈武重鎮控制西戎故選於和門付以油節思得幹
用以佐參畫如聞齊之自得科名留心政術奉沙漠之使

佐權筦之司口不告勞人稱奉職某與思謙臨洎思退皆
鑽研文學承襲軒裳暢彼聲光端其操履是可以佐樽俎
於台席奉指教於才臣而八達九衝曉巡夜警亦執金吾
之重務也咸允章奏無忝所從可依前件

授鄭公輿鎮州副使等制

勅大厦將構必藉良材雲幕旣開是資髦士况易水居常
山之北容川當桂嶺之南惟是徐方俱爲重寄凡所選用
誠皆得人爾等或以文學進身或以簪纓襲慶勉思公舉
無忝嘉招至於佐戎幕而靜轅門輯政刑而撫凋瘵亦副

車之任也正郎命服吾豈恡焉可依前件

授田密相州長史等制

勅田密等並以才識聞於所知主帥上言計司有請各從所便分以命之仍假憲臣式彰優寵

授王叔政洪州別駕等制

勅前綿州刺史王叔政等罷專城之印題別駕之榮休摧虜之策遷語掾之任此朝廷所以舉才而振滯也政緣吏昇珩以文進分符得理人之術佐賦有羨入之績隨薦實來有司上奏爰因所舉各類所能厚祿高名無忘効用可

依前件

投崔郁南鄭縣令等制

勅前藍田令崔郁前登封令鄭倚前陸渾令李元夔前京兆尹戶曹李廡等撫鰥惇奉陵寢本於廉白藉彼恪勤爰因參調之資是奉選求之命銓衡之下雖欲掄材資品之間固難專授勲膺獎任無俾蔑聞郁可與元府南鄭縣令倚可鳳翔府天興縣令元夔可莊陵令廡可高陵令

投李瑤雲陽縣令等制

勅李瑤等京縣理劇綱曹糾違書殿讐校之清閒光祿膳

饑之承副從容於蓮峯之下籌畫於雲幕之間苟非才能
不預斯選以瑤等或職任脩舉或文業優長用是被之寵
光旌此休問各從其適無忝已知可依前件

授高元裕等加階制

勅國之肆育必布霈澤所以惠及於下也爾元裕國之重
臣守我封部能以惠化富吾疲甿其地分內外之任盡勤
勞之誠皆以所能舉其官業是用因茲大慶錫以崇階各
敬爾儀無忝休命可依前件

授內諸司及供奉官敘階制

勅設堂陛所以辨等威置階級所以彰貴賤苟可授者吾無愛焉爾等或司我繁重夙夜無懈而皆溫和植性廉潔終身方將委以腹心豈止加於爵位爾其率職以事上用降以持滿勿以貴而驕人無以高而自忽保茲貞吉以永休光可依前件

授韋慤裴識等加階制

勅記曰爵人於朝與眾共之蓋以階級既崇寵榮斯異疏封錫命列土承家爾等或才推粉澤豈唯五字之工或任重藩垣自茂一方之績或官居象月或位應列星或擁緹

騎而分九衢或奉瑤墀而總六尚皆聿修官業克紹家風
爰因慶澤之辰更舉山河之誓宜思帶礪永保簪裾可依
前件日商入公博典眾共之蓋以哲慈魏崇靈榮祺異

授李駢等加階制

勅慶澤可以示恩榮貴階可以顯勞績至於敘進則有彝
章况爾等咸以儒業吏能累更事任久而益茂志且不渝
方承覆篲之勤宜錫崇基之漸封妻蔭子斯足為榮可依
前件

陳趙等授孫簡等加階級制

勅上造出秦中涓自漢古所以敘武功今所以寵文德
恩布澤今古同途爾等皆道光儒業任重藩維才膺憲試
之難德茂歲寒之操或卿曹副貳多推幹用之方或正殿
贊陽共許詳閒之美况橋山奉職鶴禁來儀旣讐事之
勞亦舉優賢之典河山在目帶礪爲期克保初終永光胄
緒可依前件

授盧宏正等加三品階制

勅夫門交檠戟身耀金紫抱孫可蔭顧室增封自非峻級
崇階其何以致爾等或以強學潤已武畧登壇或望重瑣

欽定全唐文 卷一百二十一
三
闡輝華於粉署或道光憲席輔相於青宮或以長才累更
事任或以吏道久領郡符用則殊途事皆一致爰因慶澤
以布恩榮勉思階級之高無忽柔謙之誠可依前件

授內官加階爵制

勅惟善是求有榮必報命其開國賜以崇階轉遷於禁掖
之間優寵於樞機之地我有承命爾其敬之具官某等周
旋左右出入宮闈盡誠敬於寸心守貞廉於直道皆正介
然自處蔚有休聞念其歲月之勞被以寵章之美尚
國永保宜家可依前件

封石雄妻索氏涼國夫人制

勅西川貴族南國華容代有功勳門多閥閱早以懿德婉于元臣既推內輔之才頗蘊中閨之德是宜疏封表貴開國旌賢蘭儀永配於金夫蕙問更光於石窳勉思健婦以佐良人可封涼國夫人

封竇澣等母邑號制

勅古者男子生則射以桑弧蓬矢蓋取欲使有事天地四方也及長而貴則光其六姻况當高有親堂室自立不有嘉命曷彰令儀具官竇澣等母某氏等或以衣冠胄允或

以勲績緒餘皆知訓子之方早識從夫之義爰因濡澤各
俾增封式示恩榮用光閨闈可依前件

授韋正貫京兆尹制

勅權知京兆尹韋正貫詩不云乎京邑翼翼四方是則故
趙張邊延馳名兩漢而不疑兼以儒學取重當時斯任也
吾豈易哉爾敷用政術列爲殊科再昇文字之途一舉雲
霄之路近者拔於郡府以尹京師有抑強扶弱之心得通
變適時之用煦若春日肅如秋霜干將淬而投刃皆虛騏
驥馭而追風自遠重以郊天盛禮發號鴻恩訖事而物力

安舒設禁而寇攘帖息是用嘉乃成效寵之正名爾其奉
止思盡臨事思權轄健吏而惠窮人簡簿書而提綱目處
劇勿紊居閑勿遺俾椎剽絕迹於九衢枹鼓息鳴於五夜
克揚顯績用繼前脩可依前件